

**“KUMATALIKILO
LEZA
WAKALENGA JULU
ANYIKA.”
MATALIKLO 1:1**

MATALIKILO A ZINTU ZYOONSE

CIINDI KACITANATALIKA, kwakanyina masamu, malundu antela mweenya uvungumene. Leza alikke nguwakaliko. Leza ulatwaambila cakacitika mubbuku lyakwe lyabwini, Bbaibele.

Leza wakalenga julu anyika, kakunyina ncakabelesya. Nyika tiyakajisi ciimo cabubumbe alimwi tiyakajisi cintu pe. Mpawo Leza wakati, “*Akusalale!*” eelyo kwakasalala. Mwabona, Leza ulijisi nguzu cakuti mukubelesya buyo majwi aakwe wakalenga zintu zyoonse zijanwa kujulu aanyika.

Leza wakalenga zintu zyoonse mumazuba aali cisambomwe. Ticakatola zyuulu-zyuulu zyamyaka pe. Bbaibele lilasalazya zyamazuba aali cisambomwe mbuzyakalengwa zintu notubala kuti, “*Eelyo kwakaba masiku alimwi kwakaba sikati--mbobuzuba bwakusaanguna.*” Bbaibele lilaamba mbubona oobo kubuzuba bwabili, bwatatu amazuba oonse kusika kuli bwa cisambomwe. Mubuzuba bomwe-bomwe Leza wakati, “*Akube,*” eelyo kwiinda munguzu zya majwi aakwe kwakaba kusalala, mweenya uvungumene inyika njumu, lwaanje amilonga, zisyango amasamu, zuba, mwezi anyenyeezi, nswi, banyama bavubwa abamusokwe. Kuli zyoonse eezyo Leza zyakacita zyakacitwa muciiimo cibotu.

Pele cilenge ciinda zyoonse cakalengwa mubuzuba bwacisambomwe. Wakali mwaalumi amukaintu. Aaba bakalaandeene munzila zinji-zinji kuzilenge zyoonse. Adamu, muntu wakutanguna kulengwa, wakabumbwa kuzwa kubulongo bwaansi a Leza lwakwe mwini. Eelyo Eva, mukaintu wakutaanguna, wakapangwa a Leza kuzwa kukabambo ka Adamu. Masimpe, bulenge bwabo bwakalaandeene.

Muntu wakalaandeene nkaambo wakalengwa mucikozyanyo ca Leza. Eeci tacaambi kuti muntu wakali kuboneka mbuli Leza. Muntu takonzyi kuboneka mbuli Leza nkaambo Leza muuya. Tajisi nyama azifuwa mbuli bujisi muntu. Cikozyanyo ca Leza caamba kuti kumalengelo muntu wakali setekene mbuli Leza, wakanyina cinyonyoono alimwi wakalijisi luzibo lwini-lwini lwa Leza. Leza nakamaninzya mulimo wakulenga zintu zyoonse wakati; zyoonse zili “*kabotu kapati.*”

Kusanganizya mumubili wamuntu, Leza wakabikka muuya wabuumi. Kumuntu kulikke

Leza nkwakapa mubili a muuya wabuumi. Taakwe cimwi cilenge cijisi muuya wabuumi.

Kunze lyakulengwa mucikozyanyo ca Leza, muntu wakapegwa bwami bwakweendelezya zintu zyoonse zyakali anyika. Wakeelede kweendelezya nswi, bayuni bamuluuwo, banyama a zintu zyoonse zili aanyika. Amubone kubota mulimo Leza ngwakapede muntu.

Pele mazuba aano, akaambo kacinyonyoono muntu taceendelezi zilenge zya Leza.

Tulanyonyoona nyika mbotu Leza njakalenga. Tulanyonyoona muwo mukuumpa zimwi zintu. Tulanyonyoona maanzi aali mumilonga kwiinda mukubikka maanzi aatombe. Tulasowaila zintu zitayandiki mumadolopo amumasena oomo muteelede. Tulajaya banyama bamusokwe alimwi tulatema masamu kakunyina kusyanga aambi pe.

Tatweendelezi zilenge zya Leza mbuli bweelede. Nyika yesu TAICILI mbotu mbuli Leza mbwakailenga.

Ayalo mibili yesu ilatukakila kubamba. Tulaisampaula kwiinda mubusindya, bukolwi antela kwiindilizya kufweba. Tulaisampaula notubelesya misamu iikola. Tatucili bantu basalala aabo Leza mbakalenga.


Muciindi cakusampaula mibili yesu anyika, tweeledede kulumba Leza. Atumulumbe akaambo kabuumi bwesu. Atwiibambe kabotu mibili yesu. Tumulumbe Mwami nkaambo twakapangwa ciyoosya alimwi ceebeka. Taakwe cimwi cazilenge ciyeeya mbotuyeeya. Taakwe cibelesya maanza mbotubelesya. Taakwe cijisi muuya wabuumi mbotujisi.

Muuya wabuumi ncipengo ca Leza. Kwiinda muli Jesu Kilisito, Mwanaa Leza, bumwi buzuba myuuya yesu iyoopiluka kuli Leza wakatupa. Atusumpule majwi eesu cakulumbaizya Leza katuti, *"Amumulumbe Mwami, nkaambo mbotu!"*

**AMUBALE MUBBUKU LYA MATALIKILO
CAANDAANO CAKUSAANGUNA ACABILI MU
BBAIBELE.**

**"ABOORO LEZA
WAKALENGA MUNTU
MUCIKOZYANYO
CAKWE. WAKALENGA
MWAALUMI
AMUKAINTU."
MATALIKILO 1:27**





“LINO BUBI
BWAKAZA MUNYIKA
AKAAMBO
KAMUNTU OMWE
BUYO EELYO BUBI
OOBO BWAKALETA
LUFU.”

BALOMA 5:12

CISYOMYO CAPEGWA

LEZA NAKALENGA mwaalumi amukaintu wakabapa aumwi mulimo ngwaelede kucita. Mwaalumi ngowakali musololi wamukwasyi. Mukaintu wakali sikugwasya umweelede. Nikubaboobo Adamu wakasolwedelwa mucibi a Eva ooyo wakasunkwa a Saatani. Akaambo kaako kwakaba mapenzi ataambiki munyika akumuntu. Lino atubone mbucakacitika.

Leza nakamana kulenga nyika, wakabikka bazyali besu bakutaanguna mumuunda mubotu. Ooyu wakali muunda wa Edeni. Eeci cakali cilawo cibotu kapati. Misamu yeebeka yamisyobo yoonse yakali kuzyala micelo mibotu yakaliko mumuunda oomo. Kwakali mulonga wakali kukunka maanzi oomo muntu abanyama mubakali kunywa akutilaila zisyango. Ba Adamu a Eva bakalikkomene. Kubeleka ticakali kuminya, pele cakali kukkomanisya.

Leza wakapa Adamu mulawo omwe. Wakati, toelede kulya micelo kuzwa kumusamu wakuziba, bubotu abubi uuli aakati kamuunda. Wakati, naa ukauye ncobeni uyooofwa.

Mungelo wakabisya, uutegwa Saatani wakasika kucilawo ooko. Saatani wakabuzya Eva. Wakacita kuti adonaike zyakaamba Leza. Saatani wakabeja kuciindi ncicono eeco. Wakati; *“Kufwa, peepe tamukoofwa pe! Leza ulizi kuti mwaulya meso aanu alajaluka, nkabela mulaba mbuli Leza akuziba bubotu abubi.”* Eva wakabona mucelo wakali mumusamu wakakasyidwe kuti mubotu kulya. Aboobo wakalya. Eelyo imwi micelo wakapa Adamu, awalo wakalya. Bakosotoka mulawo wa Leza muubauba. Bakabisya.

Bakaliletela lunyonyooko lwa Leza. Kuciindi ncicoona eeco bakafwa mumuuya eelyo cakatobela bakafwa lufu lwamubili.

Cakacitika akaambo kakubisya kwaba Adamu a Eva cakaboneka alimwi nkocili kulindiswe.

Nywebo andime tatujisi mukozyanyo wa Leza. Tuli basizibi. Tatuza Leza mbokweelede.

Leza wakaziba cakacitika. Kusubula ba Adamu a Eva wakabatanda mumuunda. Wakaambila Adamu kuti kuzwa ono uyoobeleva canguzu. Kubeleka cinookatazya. Tee kayi mbocibede mazuba ano? Mamvwa azincenya

ziyoomena mumuunda wako. Sena tazimeni? Leza wakaambila Adamu kuti mubili wako uyoobweeda kubulongo ooko nkuwakagwisigwa. Mibili yesu mboicita twafwa. Tee kayi? Leza wakaambila Eva kuti unoozyala bana mumaciswe. Eeci ncecicitika, tee kayi? Wakati mwaalumi wako uyookweendelezya. Mbocibede mazuba aano.

Leza tali buyo Leza ululeme, pele ngu Leza siluse, alimwi ulalekelela. Wakapa kuli ba Adamu a Eva akubabisiyi boonse cisyomyo cibotu. Wakasyomezya kutuma Mufutuli uyoopwaya mutwe, nkokuti nguzu zya Saatani. Kuciindi ncicon a eeco, Mufutuli uyooicisigwa. Mufutuli ooyu wakasyomezegwa kale-kale taakwe uumbi kunze lya Jesu Kilisito, Mwanaa Leza. Mukupenga, kufwa akubuka kuzwa kubafu wakaangununa bantu boonse kuzwa kumulandu wacinyonyoono, kuyoowa lufu anguzu zya Saatani.

Nywebo andime tulayanda Mufutuli. Notuzyalwa, tulazyalwa mucibi. Tulakona bubi bwabazyali besu bakutaanguna ba Adamu a Eva. Tulabisya buzuba abuzuba. Tulabisya ciindi notubeja, kubba, kusinganya akubaa mizeezo mibi, kusulaika mukwesu, akulemeka zimwi zintu kwiinda Leza. Mizeezo yesu mibi. Tulakanana majwi mabi. Tulacita milimo mibi. Akaambo kaako nywebo andime citweelede ndufu lwamumulilo utamani.

Kumbulizigwa kwesu nkuziba kuti Leza wakabamba cisyomyo cakutuma Mufutuli. Tulaiya zya Mufutuli mu Bbaibele.

**KUTI KAMUYANDA KWIIYA ZYA MUNTU
MBWAKABISYA, AMUBALE MATALIKILO
CAANDAANO CATATU MU BBAIBELE.**

“LINO
NDIYOBIKKA
LUSULO AKATI
KAKO AMUKAINTU
AAKATI
KALUNYUNGU
LWAKO
ALWAMUKAINTU.”
MATALIKILO 3:15

